

Peniaga tidak berdepan masalah kurang bekalan

IPOH - "Saya berniaga seperti biasa, tiada yang naik pun (harga)," demikian reaksi peniaga-peniaga di Pasar Awam Batu Gajah di sini.

Tinjauan *Sinar Harian* mendapati harga barang basah seperti ayam, ikan dan sayur-sayuran dijual pada harga tetap tanpa ada pembelian panik akibat wabak coronavirus.

Peniaga ayam, Khairil Anas Abdul Alim, 30, berkata, jualan ayamnya berjalan seperti biasa dengan harga RM8.50 sekilogram.

"Bimbang itu tetap ada terutamanya kepada pembekal apabila mereka bimbang wabak itu melarat seperti Sindrom Pernafasan Akut Teruk (SARS).

"Ketika itu, jualan ayam merosot hingga mengalami kerugian. Virus kali ini diharapkan dapat dikawal sebaiknya dalam negara," katanya di sini semalam.

Sementara itu, di **SELAYANG**,



KHAIRIL ANAS

SELANGOR, peniaga barangan basah tidak berdepan masalah kekurangan bekalan kerana ia diperolehi daripada pengeluar tempatan dan bukan diimport dari China.

Pengerusi Persatuan Pemborong dan Penaja Kecil Melayu Pasar Harian Selayang Kuala Lumpur, Abdul Aziz

Mohd Alias berkata, aktiviti perniagaan juga berjalan lancar tanpa sebarang pembelian panik dan harga jualan masih pada kadar ditetapkan.

"Kita tidak terjejas kerana tiada barangan basah yang diimport dari China. Bekalan dalam negara seperti dari Cameron Highlands masih cukup untuk menampung keperluan dan permintaan tempatan.

"Ada beberapa barang seperti lobak merah dan bawang yang diimport tapi dari negara lain pun masih berada pada harga stabil," katanya.